

citur *Fessa* vetus. Est enim & alia urbs quæ *Fessa* nova dicitur, duplici cinctâ muro altissimo ac munitissimo, *Afgara* regio a Septentrione Oceano abluitur, ab Occasu ad fluvium usque *Buragragum* protenditur: Orientale latus claudunt Montes *Gumara*, *Zaronii* & radices Montis *Zalaga*: a Meridie vero flu. *Bunaça* terminatur. Regio plana est, optima Aeris temperie gaudens. Equis & Pecore adeo abundat: ut non modo *Fessæ* his abunde provideat, sed etiam omnibus *Gumara* Montibus. Nemora hic rara: Capreolorum tamen atque Leporum magna copia. Fuerunt hic olim Opida & Arces quamplurimæ, sed bellorum injuria major pars deleta est. Opida præcipua sunt *Larissa*, & *Casar Elcabir*, hoc est Regum palatium. *Habat*, seu *Elabat* regio clauditur a Septentrione Mari Mediterraneo, ab Occasu *Algara* Paludibus, a Meridie *Suarga* fluvio, ab Ortum vero Montibus *Herculeo* Freto vicinis. Regio hæc fecundissima, ac Frugum omnium affluentia beata est, licet olim multo celebrrior ac felicior fuerit, propter Civitates antiquissimas tum a Romanis, tum a Gothis conditas. In ea præstantiores urbes sunt *Arzilla*, seu *Azella*, ampla satis, atque a Freto *Herculeo* circiter lxx mill. distans. *Tingis*, seu *Tanger*, ampla & antiqua ad Oceani littus posita, & a Freto *Herculeo* xxx mill. disita. *Septia* seu *Senta* maxima Civitas ad fauces *Herculei* Freti, olim totius *Mauritanie* Metropolis, ac *Hispanie* æmula, quæ quidē tres Civitates sub Regno *Portugallie* sunt. *Errisa* regio incipit non procul ab *Herculeo* Freto, & ad fl. usque *Nocor* seu *Hoccore* ad Ortum protenditur: ad Septentrionem prima sui parte, ut testatur *Leo*, terminatur Mediterraneo Mari, vergitque Meridiem versus ad eos usque Montes, qui *Fessæ* territorium spectant. Regio hæc prorsus aspera, Montibus frigidissimis plena, in quibus Arbores altissimæ ac rectissimæ. Frumentum non producit: Vinearum autem, Ficum, Olivarum atque Amygdalarum magnam habet copiam. Armenta hic rara: Caprarum vero, Asinorum atque Simiarum in hisce Montibus magnus reperitur numerus. Opida hic rarissima, Pagi frequentissimi. *Gareti* regio initium sumit ab Occasu a *Medulo* flumine, & ad fluvium *Mulviam* ad Ortum terminatur, a Meridie Montes ipsam a desertis *Numidie* separant, a Septentrione ad Mare Mediterraneo protenditur. Ager hujus Regionis fragosus, incultus atque aridus, *Numidie* deserto non admodum natura dissimilis: ipsa autem Regio incolis nuda fere est, postquam duas hujus præcipuas urbes *Medelam* & *Chesalam* *Hispani* occuparunt. *Chaus* ultima *Fessani* regni regio continet tertiam ipsius fere partem: namque in longitudinem cxc mill. patet, nempe a fl. *Zha* ad Ortum, ad fl. *Gurguigara* ad Occalum, in latitudinem vero mill.